
PWYLLGOR CRAFFU CYMUNEDAU DYDD IAU, 19 MAI 2016

YN BRESENNOL:

Y CYNGHORWYR: Annwen Daniels, Annwen Hughes, Louise Hughes, Eric M. Jones, Dilwyn Morgan, Linda Morgan, E. Caerwyn Roberts, Angela Russell, Gruffydd Williams ac Eurig Wyn.

SWYDDOGION: Arwel Ellis Jones (Uwch Reolwr Cefnogaeth Gorfforaethol) a Lowri Haf Evans (Swyddog Cefnogi Aelodau)

HEFYD YN BRESENNOL:

- a) Mewn perthynas ag eitem 7 ar y rhaglen - Cynghorydd John Wynn Jones - Aelod Cabinet Amgylchedd, Gwyn Morris Jones (Pennaeth Priffyrdd a Bwrdeistrefol) ac Alun W Jones (Peiriannydd Grŵp Bwrdeistrefol)
- b) Mewn perthynas ag eitem 8 ar y rhaglen - Cynghorydd John Wynn Jones - Aelod Cabinet Amgylchedd, Gwyn Morris Jones (Pennaeth Priffyrdd a Bwrdeistrefol) a Steffan Jones (Uwch Reolwr Gwastraff a Chomisiynu).
- c) Mewn perthynas ag eitem 9 ar y rhaglen - Cynghorydd Ioan Thomas - Aelod Cabinet Tai, Hywel James (Prif Lyfngellydd) a Catrin Thomas (Uwch Reolwr Dysgu Cymunedol)
- d) Mewn perthynas ag eitem 10 ar y rhaglen - Cynghorydd Ioan Thomas - Aelod Cabinet Tai ac Arwel W Owen (Uwch Reolwr Tai)
- e) Mewn perthynas ag eitem 11 ar y rhaglen - Cynghorydd Dafydd Meurig – Aelod Cabinet Cynllunio a Rheoleiddio, Rhun ap Ieuan (Uwch Gyfreithiwr (Gwasanaethau) a Cara Owen (Rheolwr Rheolaeth Datblygu)
- f) Mewn perthynas ag eitem 12 ar y rhaglen - Cynghorydd Gareth Thomas – Aelod Cabinet Addysg ac Owen Owens (Uwch Reolwr Ysgolion)

Cymerodd y Cadeirydd Angela Russell y cyfle i ddiolch i bawb am eu cefnogaeth a'u cyfraniad yn ystod ei chyfnod fel Is Gadeirydd a Chadeirydd y Pwyllgor.

1. ETHOL CADEIRYDD

PENDERFYNWYD ethol y Cynghorydd Caerwyn Roberts yn Gadeirydd y Pwyllgor Craffu hwn am 2016/17.

2. ETHOL IS-GADEIRYDD

PENDERFYNWYD ethol y Cynghorydd Dilwyn Morgan yn Is-gadeirydd y Pwyllgor Craffu hwn am 2016/17.

3. YMDDIHEURIADAU

Derbyniwyd ymddiheuriadau gan y Cynghorwyr, Stephen Churchman, Tudor Owen, Mike Stevens a Glyn Thomas

4. DATGAN BUDDIANT PERSONOL

Datganodd yr aelodau canlynol fuddiant personol mewn perthynas â'r eitem a nodir isod:

- Y Cyngorydd Angela Russell, yn eitem 9 ar y rhaglen oherwydd natur ei gwaith.
- Y Cyngorydd Linda Morgan, yn eitem 12 ar y rhaglen oherwydd ei bod yn gweithio yng Ngholeg Meirion Dwyfor

5. MATERION BRYS

Dim i'w nodi

6. COFNODION

Derbyniwyd cofnodion y cyfarfod diwethaf a gynhaliwyd ar 12 Ionawr 2016 fel cofnod cywir o'r cyfarfod

7. TOILEDAU CYHOEDDUS

- a) Cyflwynwyd adroddiad gan Aelod Cabinet Amgylchedd yn argymhell cynllun i geisio cadw'r toiledau cyhoeddus hynny sydd o dan fygythiad o gau, yn agored a gweithredol i'r dyfodol. Cyfeiriwyd at ymarferiad Her Gwynedd lle bu i'r Cyngor, yn ei gyfarfod ar y 3ydd o Fawrth 2016, argymhell gwneud toriadau oedd yn cynnwys 'cau 50 allan o 73 o doiledau cyhoeddus y Sir' gan dorri £244,000 o'r gyllideb ar gyfer y gwasanaeth. Eglurwyd mai bwriad y cynllun amgen yma oedd cwrdd â'r toriad drwy geisio cynnal y ddarpariaeth bresennol o doiledau cyhoeddus yn y Sir.

Gwnaed cais gan yr Aelod Cabinet i'r Pwyllgor ystyried y cynllun a chyfeirio eu hargymhelliad i'r Cabinet. Eglurwyd bod y Cynllun yn ddibynnol ar ennyn diddordeb Cyngorau Cymuned a Thref i Bartneriaethau er mwyn sicrhau parhad ar y ddarpariaeth, drwy gyfrannu yn ariannol at y cynllun. Tynnwyd sylw at y ddau opsiwn:

- Opsiwn 1 - lefel cyfraniad o £4000 i bob toiled yn agored drwy'r flwyddyn a chyfraniad o £2000 i bob toiled sydd yn agored yn dymhorol
- Opsiwn 2 – cyfraniad cyfwerth a thraean (33.3%) cost blynyddol ar gyfartaledd o weithredu'r toiled

Nodwyd bod y cynllun yn fodd o gynnal y ddarpariaeth, ac os na fydd sêl bendith i'r cynllun, byddai rhaid asesu'r angen yn lleol.

- b) Yn ystod y drafodaeth nodwyd y sylwadau canlynol yn erbyn yr argymhelliad:
- Nad oedd y cynllun wedi ei graffu yn ddigonol
 - Papur Gwyn gan y Gwasanaeth Iechyd Genedlaethol (GIG) yn nodi bod rhaid gwella profiad y claf drwy 'wrando a dysgu' ac i sefydliadau ddatblygu strategaethau clir i gyfarch hyn - cau toiledau cyhoeddus yn groes i hyn.
 - Nad oedd digon o ystyriaeth wedi ei roi ar drigolion bregus a thrigolion gyda chyflyrau iechyd.
 - Rhaid sicrhau bod digon o doiledau cyhoeddus ar gael - Gwynedd yn ardal sydd yn ddibynnol ar dwristiaeth ac felly angen sicrhau toiledau o ansawdd uchel.
 - Deiseb yn erbyn y penderfyniad o gau'r toiledau yn casglu momentwm gyda dros 2000 o enwau - nid oes rheswm digonol i gau toiledau cyhoeddus

- c) Mewn ymateb i'r sylwadau, atgoffwyd yr Aelodau bod toriad i'r gwasanaeth eisoes wedi ei gytuno yn y Cyngor Llawn ym mis Mawrth 2016, ac felly rhaid oedd ystyried ffordd o symud ymlaen. Derbyniodd yr Aelod Cabinet y sylw bod y pwnc yn un oedd yn amlygu pryderon ymysg cymunedau. Nododd hefyd fod ganddo gydymdeimlad llawn gyda thrigolion â chyflyrau iechyd ac y byddai yn rhoi ystyriaeth lawn i hyn. Ategwyd y byddai'r toiledau yn parhau ar agor hyd nes bydd ymgynghori gyda'r cymunedau perthnasol wedi cymryd lle.
- ch) Mewn ymateb, nodwyd y sylwadau canlynol yn gefnogol i'r argymhelliad:
- Derbyn yr adroddiad a llongyfarch yn adran am ystyried cynllun amgen ar gyfer toiledau cyhoeddus mewn dull positif. Cyfeiriwyd at enghreifftiau da drwy'r Sir o doiledau sydd eisoes yn cael eu rheoli gan y Cyngorau Cymuned
 - Croesawu'r adroddiad. Cyfle da yma i sefydlu partneriaeth gymunedol - dyma'r ffordd ymlaen. Cyfle da i gydweithio.
 - I'r rhai hynny sydd yn fregus neu a chyflyrau iechyd, awgrymwyd eu bod yn trefnu eu siwrne ymlaen llaw a bod gwybodaeth ardderchog am doiledau cyhoeddus y sir ar gael ar wefan y Cyngor.
 - Rhai Cyngorau Cymuned eisoes wedi cynnal trafodaethau yn lleol ar y mater
 - Gwnaed cais am wybodaeth ychwanegol am incwm toiledau a chyfraniad yr Asiantaethau Cefnffyrdd.
 - Awgrym i godi tal yn y toiledau hynny sydd yn ddrud i'w cynnal
- d) Mewn ymateb i gwestiwn ynglŷn ag anghysondebau mewn defnydd toiledau a'r baich gwaith ychwanegol fydd yn wynebu Cyngorau Cymuned, amlygwyd bod grantiau ar gael i'r Cyngorau Cymuned geisio amdanynt ac y byddai Swyddogion o'r Adran Economi ar gael i gynnig gwybodaeth am y grantiau hyn. Nodwyd y gall y broses drosglwyddo gymryd hyd at 3 blynedd i'w gwireddu.
- dd) Mewn ymateb i gwestiwn ynglŷn â grantiau toiledau cymunedol, nodwyd bod y grantiau sydd ar gael yn parhau - Pennaeth y Gwasanaeth i adrodd yn unigol i'r Cynghorydd L Morgan.

Cynigiwyd ac eiliwyd i gefnogi opsiwn 1.

PENDERFYNWYD derbyn yr argymhellion a nodwyd yn 3.1 o'r adroddiad gyda'r Pwyllgor yn cefnogi opsiwn 1- lefel cyfraniad o £4000 i bob toiled yn agored drwy'r flwyddyn a chyfraniad o £2000 i bob toiled sydd yn agored yn dymhorol

Anogwyd yr Adran i;

- edrych ymhellach i gyfleon i godi tal yn y toiledau drytaf (a chynghori Cyngorau Cymunedau a Thref ar sut i wneud hyn)
- edrych os oes modd ymestyn ymhellach y Cynllun Grant Llywodraeth Cymru ar gyfer Toliedau Cyhoeddus

8. ADOLYGIAD O DREFNIADAU CASGLU GWASTRAFF GWYNEDD Y CYNGOR

Ymneilltuodd y Cynghorydd Angela Russell o'r ystafell yn ystod y drafodaeth.

- a) Cyflwynwyd adroddiad gan Aelod Cabinet Amgylchedd yn amlygu bwriad yr Adran Priffyrdd a Bwrdeistrefol i godi ffi am gasglu gwastraff gardd.

Mewn cyfarfod a gynhaliwyd 16.12.14 bu i'r Cabinet gymeradwyo gweithredu ystod o gynlluniau arbedion effeithlonrwydd a oedd yn cynnwys 'Adolygu Gwasanaeth Gwastraff Gardd' i gyflawni arbedion o £750,000 yn y flwyddyn ariannol 2017/2018.

O dan 'Reoliadau Gwastraff a Reoli'r 2012 gall awdurdodau godi ffi ar gasglu gwastraff gardd gan drigolion (hyn ddim i gynnwys y gost o'i waredu) ac mae Deddf Amddiffyn yr Amgylchedd 1990 yn rhoddi hyblygrwydd ar godi ffi neu beidio ar hawl pe dymunir i godi ffi resymol am y gwasanaeth.

Mae Llywodraeth Cymru yn ei ganllawiau ymarfer da 'Glasbrint Casglu' yn argymhell y dylid codi ffi ar drigolion am gasglu gwastraff gardd ar amllder pob pythefnos a hyn i bwrrpas lleihau ar y cyfaint o wastraff gardd a roddir allan gan drigolion ac er mwyn arbed costau casglu a thirlenwi.

Adroddwyd bod gwastraff gardd yn cyfrannu at gyflawni targedau ailgylchu ac ym Mawrth 2016 bu i'r Cyngor lwyddo i gyrraedd 58.75% (targed statudol o 58%). Nodwyd, pe byddai'r ganran ailgylchu yn gostwng yn is na'r targed yna byddai'r Cyngor yn derbyn dirwyon. Amlygwyd y bydd gostyngiad tebygol yn y galw am y gwasanaeth yn y flwyddyn gyntaf, ond rhagwelir bydd cynnydd yn y flwyddyn olynol.

Gwnaed sylw nad oedd codi ffi ar unrhyw wasanaeth yn fater poblogaidd, ond bod rhaid ymateb i'r toriadau neu bydd rhaid ystyried toriadau pellach mewn gwasanaethau eraill.

Yr opsiynau dan sylw;

- Opsiwn 1: Parhau i gasglu gwastraff gardd am 12 mis o'r flwyddyn gan osod lefel ffi o £33 y flwyddyn (Arbediad blynyddol - £750,000)
 - Opsiwn 2: Casglu gwastraff gardd am 9 mis y flwyddyn gan osod lefel ffi o £30 mis y flwyddyn (arbediad blynyddol - £756,410)
- b) Mewn ymateb i sylw ynglŷn â phryder o dderbyn dirwyon am fethu cyrraedd targedau ailgylchu cenedlaethol, dywedodd Pennaeth Priffyrdd a Bwrdeistrefol bod yr adran yn rhannu'r pryderon hynny ac yn pwysleisio yr angen i barhau i gyflawni a chynnal y gwasanaeth i'r un safon gan fonitro'r sefyllfa yn ofalus.
- c) Yn ystod y drafodaeth nodwyd y sylwadau canlynol:
- Nad oedd cyflwyno'r newidiadau yn amserol o ystyried newidiadau diweddar i drefniadau ailgylchu - buasai hyn yn gam yn ôl
 - Bod chwe swydd yn y fantol – nid oedd hyn yn newyddion da
 - Cais i'r Cyngor ystyried sachau hesian fel opsiwn
 - Dim yn gefnogol i'r taliad
 - Cynnydd tebygol mewn tipio slei bach a cham ddefnydd o'r bin gwastraff gweddilliol – sut fydd hyn yn cael ei blismona?
 - Angen ystyried sut y bydd unigolion bregus yn ymdopi
 - Dylid annog mwy o ddefnydd o'r bin brown
 - Cais i ystyried gostyngiad mewn ffi i fin llai ei faint
 - Ymddengys bod pobl y Sir yn cael eu cosbi am gompostio - angen i Lywodraeth Cymru addasu'r fformiwla ailgylchu

Mewn ymateb i'r sylwadau, atgoffwyd yr Aelodau bod y bwriad eisoes wedi ei gymeradwyo ac felly gwireddu'r arbediad oedd dan sylw. Cytunwyd gyda'r awgrym

nad oedd yr addasiad yn amserol, ond ategwyd mai sefyllfa ariannol y Cyngor oedd yn gorfodi'r newid hwn. Cadarnhawyd y byddai'r sefyllfa yn cael ei monitro yn ofalus.

Nodwyd bod defnyddio sachau hesian wedi cael ei ystyried, ond bod y sachau yn fach o ran maint ac yn costio oddeutu £16 yr un. Yng nghyd destun cam ddefnyddio'r bin gwastraff gweddilliol, amlygwyd y byddai modd cyflwyno camau gorfodaeth i reoli hyn.

Mewn ymateb i gwestiwn ynglŷn â gwerthu'r compost sydd yn cael ei gynhyrchu, nodwyd bod yr adran wedi edrych ar y cyfleodd i'w farchnata, ond gan mai 'gwelliant pridd' ydoedd ac nid compost, nid oedd modd ei werthu yn gyhoeddus. Ategwyd bod y 'gwelliant pridd' yn cael ei waredu ar dir llwyd neu ei ddsbarthu am ddim i drigolion Gwynedd drwy'r Canolfannau Ailgylchu.

Wrth drafod opsiynau'r cynllun, gwnaed sylw gan yr Uwch Reolwr Gwastraff a Chomisiynu y byddai parhau i gasglu am 12 mis o'r flwyddyn yn gwella'r posibilrwydd o lwyddo i gyrraedd y targedau cenedlaethol gan fod oddeutu 200 tunnell y mis o wastraff yn cael ei gasglu tu allan i'r tymor tyfu.

Cynigiwyd ac eiliwyd i gynnig opsiwn 1

Penderfynwyd derbyn yr argymhelliad i godi ffi ar drigolion am gasglu gwastraff gardd am 12 mis y flwyddyn, ond amlygwyd

- **Pryder am effaith y newidiadau ar y targedau ailgylchu, o ystyried;-**
 - o **Bod ailgylchu ar gynydd o fewn y sir**
 - o **Bod trigolion y sir newydd ddod i arfer a'r trefniadau newydd**
 - o **Bod dirwyon sylweddol am fethu cyrraedd y targed statudol**
- **Pryder bod cost ychwanegol ar rai teuluoedd o gyflwyno'r cynllun**
- **Bod cais i'r Aelodau Cabinet gynnal trafodaeth gyda Llywodraeth Cymru i bwrpas cynnwys tunelloedd compostio cartref yn y cyfrifiad ailgylchu fel nad yw yn cael effaith ar berfformiad y Cyngor yn erbyn eu targedau**

9. STRATEGAETH 'MWY NA LLYFRAU': GWASANAETH LLYFRGELL CYNGOR GWYNEDD

- a) Cyflwynwyd adroddiad gan Uwch Reolwr Dysgu Cymunedol yr Adran Economi yn gofyn i'r aelodau graffu'r broses sydd wedi ei dilyn ar gyfer llunio'r Strategaeth 'Mwy na Llyfrau'. Nododd yr Aelod Cabinet bod darparu Gwasanaeth Llyfrgell 'cynhwysfawr ac effeithlon i bawb sydd yn dymuno ei ddefnyddio' yn ofyniad statudol o dan Ddeddf Llyfrgelloedd Cyhoeddus ac Amgueddfeydd 1964.
- b) Adroddwyd bod ymgynghoriad cyhoeddus i gasglu barn syniadau trigolion, defnyddwyr a phartneriaid ar y Strategaeth "Mwy na Llyfrau" wedi ei gynnal yn ystod Mai - Gorffennaf 2015. Ategwyd bod ystod o argymhellion wedi eu cyflwyno gan yr ymgynghorwyr oedd yn casglu a dadansoddi'r adborth a gyflwynwyd gan y cyhoedd a'r partneriaid. Nodwyd rhai o'r sylwadau a gyflwynwyd gan yr ymgynghorwr,
 - Yr angen i addasu'r weledigaeth a chryfhau rhai o'r blaenoriaethau.
 - nad yw parhau gyda'r sefyllfa bresennol yn gynaliadwy.
 - amharodrwydd cyffredinol ymysg y cyhoedd i weld unrhyw newid i'r rhwydwaith o lyfrgelloedd, hyd yn oed mewn cyd-destun ariannol heriol.

Amlygwyd bod y Strategaeth yn argymhell bod y Gwasanaeth Llyfrgell yn canolbwyntio ar bedwar maes blaenoriaeth sef, cynnig darllen, cynnig gwybodaeth, cynnig iechyd a lles a cynnig digidol.

I gyflawni Strategaeth o fewn y gyllideb argymhellwyd categorieiddio'r math o ddarpariaeth sydd ei angen ar draws y Sir ac argymhellwyd symud i ddarpariaeth yn seiliedig ar bedwar model

- Llyfrgelloedd Dalgylch
- Llyfrgelloedd Cymunedol o dan reolaeth y Cyngor
- Gwasanaethau Teithiol
- Dolen neu Gyswllt Cymunedol

c) Yn ystod y drafodaeth nodwyd y sylwadau canlynol:

- Pryder bod hyn yn ysgwyddo baich ychwanegol a'r Gynghorau Cymuned. Nodwyd mai gwirfoddolwyr sydd yn gweithredu ar y Cynghorau a bod y niferoedd aelodau yn lleihau oherwydd bod cyfrifoldebau ychwanegol yn cael eu cynnig iddynt o bob cyfeiriad. Amlygwyd bod angen cynnal trafodaethau i amlygu'r disgwyliadau ychwanegol hyn.

Mewn ymateb i'r sylw, nodwyd bod pryder ynglŷn â chapasiti gwirfoddolwyr i gyflawni eisoes wedi cael ei ystyried ac yr argymhelliad yw i'r Cyngor wneud 'cynnig o'r hyn gall ei gyflawni', gydag ymateb yn ddibynol ar 'yr hyn gall y cynghorau cymuned eu cyflawni'. Ategwyd nad datrysiadau oedd yn cael eu rhannu ond datganiad o'r hyn y gall y Cyngor ei gynnal..

- Mewn ymateb i leihad mewn cyllideb i brynu llyfrau, cynigiwyd cynnal 'Diwrnod Amnest'
- Angen ystyried dod a gwasanaethau at ei gilydd - llyfrgelloedd, canolfannau twristiaeth, toiledau cyhoeddus
- Pwysleisiwyd yr angen i gynnal trafodaethau yn lleol er mwyn ymateb yn bositif i'r her
- Y modelau i'w croesau ac yn rai oedd yn ymateb yn greadigol i sicrhau bod y gwasanaeth llyfrgelloedd arbennig yma yn parhau yng Ngwynedd.
- Beth yw gwerth 'Lori Ni'?
- Angen buddsoddiad pellach mewn llyfrau print bras Cymraeg

ch) Mewn ymateb i'r sylwadau nodwyd bod y Polisi Rhoddion yn un sydd wedi ei ystyried a bod llyfrgelloedd yn y gorffennol wedi derbyn rhoddion gwerthfawr iawn. Er hynny, yn sgil prinder staff, nodwyd bod hyn yn dasg ychwanegol i staff ddethol a dewis llyfrau addas i'w benthyg.

Yng nghyd-destun gwerth 'Lori Ni' nodwyd bod gan y lori swyddogaeth bwysig iawn o fewn y gwasanaeth - yn sicrhau bod llyfrau print a digidol yn cyrraedd pob plentyn yr awdurdod drwy gydweithrediad yr ysgolion. Ategwyd bod yr ysgolion, sydd hefyd yn wynebu toriadau mewn cyllidebau, yn torri ar lyfrau, ac felly yn gwerthfawrogi cyflenwad cyson o lyfrau i blant. Er bod cost cynnal y lori oddeutu £30,000 y flwyddyn ategwyd bod hyn yn werth pob ceiniog.

d) Yng nghyd-destun llyfrau print bras, nodwyd mai yn y llyfrgell yn unig mae modd cael rhain, ac mai Gwynedd oedd yn arwain ar gynhyrchu llyfrau print bras Cymraeg - angen annog awdurdodau eraill i brynu i mewn i'r cynllun.

- dd) Derbyniwyd y sylw bod angen ystyried holl asedau'r Cyngor. Y gobaith yw y bydd trafodaethau gyda Chynghorau Lleol yn rhyddhau opsiynau posib fel bod modd cael gwell defnydd o adnoddau'r cyngor.

PENDERFYNWYD derbyn y model yn fras, ond amlygwyd;

- **Pryder ar roi pwysau ychwanegol ar Gynghorau Cymuned yn sgil y modelau newydd a bod angen cynnal trafodaeth am y capasiti hyn gyda'r gymuned leol**
- **Yr angen i gyfuno llyfrgelloedd gydag asedau eraill y Cyngor**

10. DIGARTREFEDD

- a) Cyflwynwyd adroddiad yn manylu ar gynllun gweithredu'r Adran Tai a ddatblygwyd i ymateb i argymhellion yr Ymchwiliad Digartrefedd a gwblhawyd 17.9.2016. Diolchwyd am fewnbwn yr Aelodau i'r ymchwiliad a nododd yr Aelod Cabinet bod mwyafrif o'r argymhellion wedi eu gweithredu. Ychwanegodd yr Uwch Reolwr Tai bod yr ymchwiliad wedi bod yn werthfawr ac yn ddefnyddiol i wella'r gwasanaeth.
- b) Mewn ymateb, nododd y Cynghorydd Eric M Jones (Cadeirydd yr Ymchwiliad) ei fod wedi bod yn falch o gael y cyfle i fod yn rhan o'r ymchwiliad a gwneud cyfraniad positif i'r gwasanaeth digartrefedd - diolchodd i staff yr Adran Tai am yr hyn sydd wedi ei gyflawni ac am yr adroddiad cynnydd.
- c) Wrth drafod yr argymhellion rhoddwyd diweddariad ar y rhai oedd wedi eu cwblhau a hefyd y rhai hynny oedd ar y gweill. Nododd yr Aelod Cabinet bod yr ymchwiliad craffu wedi bod yn rhan o broses sydd i'w chrosawu.
- ch) Yn ystod y drafodaeth nodwyd y sylwadau canlynol:
- Pryder bod pobl tu allan i'r Sir yn cyflwyno eu hunain yn ddigartref ac felly yn cael blaenoriaeth dros drigolion lleol oherwydd y system pwyntiau
 - Diffyg tai cymdeithasol i bobl leol
- d) Mewn ymateb i'r sylw nododd yr Uwch Reolwr Tai bod ystyriaethau safonol a lleol yn cael eu gwneud ar gyfer pob cais. Nodwyd bod pob ymgais wedi ei gwneud i uchafu yr elfen 'lleol' mor uchel â phosib ar y rhestr blaenoriaethau. Cytunwyd nad oedd yr adran yn cwrdd ar anghenion bob tro a bod hyn oherwydd sefyllfaoedd anodd. Amlygwyd bod dros 80% o osodiadau i unigolion gyda chyswllt 'gyda'r gymuned', dros 90% gyda chyswllt 'gyda chymuned gyfagos' a nifer fechan iawn (2%) heb gyswllt. Ategwyd bod rhaid gweithredu o fewn Deddf Gwlad ac felly rhoddir blaenoriaeth ar y 'angen'.

Yng nghyd destun, 'uchafu iaith', nodwyd bod cyswllt eisoes wedi ei wneud gyda'r Cynulliad ac nad oedd modd uchafu hyn yn bellach. Nodwyd bod gan Loegr Ddeddf Lleol (Localism Act), ond nid yw yn bodoli yng Nghymru - Cymru yn ddibynnol ar y Ddeddf Tai. Cynigiwyd, yn sgil y newidiadau diweddar i Gabinet y Cynulliad y byddai modd ail gyflwyno'r neges yma.

Derbyniwyd yr adroddiad cynnydd a croesawyd y gwaith oedd wedi ei weithredu eisoes ar y mwyafrif o'r argymhellion er mwyn gwella'r gwasanaeth

11. CYTUNDEBAU 106

- a) Cyflwynwyd adroddiad i'r Pwyllgor Craffu yn adrodd ar sylwadau ac argymhellion Grŵp Tasg a Gorffen (grŵp bychan o gynghorwyr a swyddogion) oedd yn edrych

ar opsiynau posib ar gyfer y defnydd o Gytundebau 106 gan y Cyngor i'r dyfodol. Cafwyd mewnbwn arbenigwyr allanol i'r trafodaethau hyn.

Nodwyd bod gwaith y grŵp wedi bod yn ddefnyddiol iawn ac wedi ystyried y prif faterion sydd yn ymwneud â'r defnydd o gytundebau 106. Daethpwyd i'r amlwg bod angen gwneud gwelliannau er mwyn cyfarch pryderon sydd wedi codi dros y blynyddoedd diwethaf.

- b) Amlygodd yr Aelod Cabinet bod y cyfarfodydd Grŵp Tasg a Gorffen wedi bod yn werthfawr a bod yr argymhellion a nodwyd yn yr adroddiad yn rai rhesymol ac amlwg. Gwahoddwyd y Pwyllgor i ystyried casgliadau ac argymhellion yr is grŵp.
- c) Mewn ymateb i'r adroddiad, cytunwyd gyda'r feirniadaeth bod Cytundebau 106 yn addas ar gyfer datblygiadau mawr a bod problemau yn codi gyda datblygiadau bach, unigol a datblygiadau hunan-adeiladu.
- d) Mewn ymateb i gwestiwn ynglŷn ag hyfywdra gosod cytundeb 106 ar eiddo, nodwyd bod rhaid ystyried pob cais yn unigol. Ategwyd y byddai rhaid i'r gwasanaeth ystyried addasrwydd a hyblygrwydd cytundeb 106 gan deilwra i'r hyn sydd ei angen. I sicrhau os ydyw yn hyfyw bydd y gwasanaeth yn defnyddio Prisiwr Dosbarth er mwyn deall y sefyllfa yn well, bod y trefniadau cywir yn cael eu dilyn a bod cadarnhad yn cael ei roi o ran hyfywdra.
- e) Mewn ymateb i gwestiwn ynglŷn â chyfraniadau addysgol mewn sefyllfaoedd lle ceir datblygiadau tai newydd mewn cymunedau, cadarnhawyd mai cost plentyn ysgol sydd yn cael ei ystyried ar nid gwerth y tŷ. Cadarnhawyd bod sail ddeddfwriaethol i hyn gyda fformiwla benodol i'w ddilyn - anodd iawn yw uchafu'r gost yma. Mewn ymateb, nododd y Cynghorydd G Williams bod angen herio'r rheolau hyn.

PENDERFYNWYD mabwysiadau'r argymhellion a nodwyd ym mharagraff 9 o'r adroddiad.

12. CLUDIANT ADDYSG ÔL-16

Ymneilltuodd y Cynghorydd Linda Morgan o'r ystafell yn ystod y drafodaeth

- a) Cyflwynwyd adroddiad gan yr Aelod Cabinet yn rhoi diweddariad ar y cynnydd pellach o ran gweithredu argymhellion Ymchwiliad Craffu Cludiant Addysg OI-16. Amlygwyd bod yr argymhellion wedi eu rhannu i dri categori
 - Gweithredu yn syth
 - Cydweithio yn y tymor canolig gyda gwasanaethau / partneriaid eraill er mwyn ymchwilio i ymarferoldeb gweithredu'r argymhellion
 - Peidio ystyried yr argymhellion hyn am y tro

Ategwyd bod nifer o'r argymhellion wedi eu cynnwys yn y Polisi Cludiant newydd a bod yr argymhellion sydd yn weddill yn ddibynnol ar drafodaethau. Cydnabuwyd bod rhai o'r trafodaethau wedi bod yn araf a'r rhwystr mwyaf oedd cynnal trafodaethau gyda'r coleg, a datrys y broblem 'teithio yn hyblyg'. Adroddwyd bod llawer o waith wedi ei wneud i geisio datrys yr uchod, ond heb ddwyn ffrwyth hyd yn hyn. Derbyniodd bod arafwch gyda'r broses ac unrhyw gerydd am hyn.

Derbyniodd yr Uwch Reolwr Ysgolion bod yr ymateb ffurfiol wedi bod yn araf, ond adroddodd ei fod bellach wedi derbyn llythyr (dyddiedig 16.5.16) gan y Coleg yn

nodi eu dymuniad i fod yn asiant ac yn agored i drafod ymhellach. Ychwanegwyd bod y trafodaethau hyn i ddechrau 21.6.16. Ategwyd bod y Coleg wedi nodi yn y llythyr eu bod yn ystyried 'trosglwyddo'r ddarpariaeth i gyd' ac felly angen trafod cynnwys y llythyr mewn manylder. Cyfeiriwyd hefyd mai at Meirion Dwyfor yn unig roedd y llythyr ac felly hyn hefyd angen ystyriaeth llawn.

Adroddwyd bod bwriad sefydlu Fforwm Defnyddiwr, ond angen sicrhau bod 'cynnig ar y bwrdd' i'r defnyddwyr yng nghyd destun ymateb i'r angen o gynyddu'r hyblygrwydd heb ychwanegu cost. Amlygwyd y byddai'r Fforwm Defnyddwyr yn cynnwys cynrychiolwyr o'r Coleg, Swyddogion y Cyngor, Darparwyr Cludiant a Myfyrwyr. Y gobaith yw i'r Fforwm aeddfedu fel y byddai yn rhoi pwyslais ar wleidyddion i weithredu.

Nodwyd bod system rhandaliadau misol wedi ei sefydlu, ond yng nghyd-destun myfyrwyr yn derbyn lwfansau hwyr i dalu costau, nid oedd hyn yn flaenoriaeth gan y Colegau. Ategwyd y bwriad o godi hyn yn y trafodaethau gyda'r Coleg.

Adroddwyd bod 37% o lwybrau teithio gyda chyfyngiad amser; 40% o lwybrau heb gyfyngiad a 23% yn fysiau coleg pur. Yr her fwyaf yw ceisio datrys i'r llwybrau teithio hynny sydd yn gyfyngedig.

b) Mewn ymateb i'r adroddiad nododd y Cynghorydd G Williams bod angen cymharu'r hyn sydd ar gael yn Lloegr gyda'r hyn sydd ar gael yng Nghymru. Roedd yn parhau gyda phryderon nad oedd Cyngor Gwynedd wedi cynorthwyo aelwydydd y Sir gyda chostau a thegwch addysg eu plant.

c) Yn ystod y drafodaeth nodwyd y sylwadau canlynol:

- Bod y Coleg yn araf yn derbyn cyfrifoldeb dros y myfyrwyr - nid yw teithio yn llesol i blant ac nid yw'r colegau yn rhoi digon o ystyriaeth i hyn. Awgrymwyd y dylai'r Coleg arwain ar y mater a cheisio datrys y broblem
- Rhaid rhoi plant a phobl ifanc Gwynedd yn ganolog i'r gwasanaeth. Rhaid sicrhau bod pob plentyn yn cael cyfleoedd cyfartal
- Rhaid datrys y broblem 'tocyn hyblyg' a rhoi pob cefnogaeth posib i blant y sir - dyma yw ein dyfodol
- Rhaid cael tocyn sydd yn gweithio - un sydd yn effeithiol
- Rhaid ystyried llês y plant
- Angen erfyn ar yr Aelod Cabinet newydd o fewn y Cynulliad i edrych ar hyn

ch) Mewn ymateb i'r sylwadau uchod, nododd yr Aelod Cabinet bod hyblygrwydd y tocyn yn elfennol, ond bod natur y cytundebau bysus yn amrywiol. Rhaid felly ceisio datrys i alluogi'r 37% o lwybrau cyfyngedig fod yn hyblyg heb gost ychwanegol i'r Cyngor.

Nodwyd y byddai unrhyw wybodaeth o'r cyfarfod gyda'r Coleg ac o'r Fforwm Defnyddwyr yn cael eu rhyddhau i Gadeirydd y Pwyllgor Craffu Cymunedau unwaith y byddant wedi eu cynnal.

d) Gwnaed sylw bod argymhellion y Cyngor wedi eu gweithredu ond bod y diffyg gweithredu gan y partneriaethau allanol. Awgrymwyd,

- Ail negodi natur cytundebau gyda'r cwmnïau bysiau pan yn amserol
- Ystyried edrych ar dystiolaeth o blant sydd yn disgyn allan o addysg oherwydd yr elfen deithiol / llesiant, fuasai o ganlyniad yn golled incwm i'r coleg - modd gwneud achos busnes yma

PENDERFYNWYD derbyn yr adroddiad

**Mynegwyd siom ddirfawr ar yr elfennau amlycaf a dymuniad y Pwyllgor oedd parhau i bwyso ar gael pethau yn eu lle erbyn Medi 2016.
Nodwyd bod angen cynnal Fforwm Defnyddwyr yn fuan a bod angen anfon neges at y Gweinidog newydd i geisio'r un tegwch i blant Cymru a phlant Lloegr.**